

समे – 12:25 hrs.

<><><><><><>

JK-Election Results

जम्मू-कश्मीर ते हरियाणा विधानसभा चुनाएं लेई पाए गेदे वोटें दी गिनतरी आला कम्म सबूरा होई गेआ ऐ। जम्मू-कश्मीर दी च नेशनल कांफ्रेंस गी 42 ते ओदी भ्याल कांग्रेस गी 6 सीटां थोइयां न जिसले जे बीजेपी नै 29 सीटें पर जित हासिल कीती। जम्मू-कश्मीर पीपल्स डेमोक्रेटिक पार्टी गी त्रै सीटां थोइयां। जम्मू-कश्मीर पीपल्स कांफ्रेंस, सीपीआई (एम) ते आम आदमी पार्टी गी इक्क-इक्क सीट हासिल होई ऐ। कल घोशित नतीजें च 7 सीटां आजाद मेदवारें अपने नां कीतियां न। नेशनल कांफ्रेंस ते कांग्रेस गठबंधन जम्मू-कश्मीर च अगली सरकार बनाने लेई पूरी चाल्ली तैयार ऐ कि जे 90 मिम्बरें आली जम्मू-कश्मीर विधानसभा च 48 दा आंकड़ा नेशनल कांफ्रेंस ते कांग्रेस भ्याल पार करी गए न। नेशनल कांफ्रेंस दे नेता ते साबका मुखमंत्री उमर अब्दुल्ला होरें बडगाम ते गांदरबल आलियां दवै सीटां जिती लैतियां न। जम्मू-कश्मीर पीपल्स कांफ्रेंस दे सज्जाद गनी लोन होरें हंदवाड़ा थवां जित हासिल कीती। सीपीआई (एम) दे मोहम्मद युसूफ तारीगामी होरें कुलगाम विधानसभा सीट थवां जित हासिल कीती। पीडीपी पार्टी प्रमुख महबूबा मुफ्ती हुंदी धी इलतजा मुफ्ती बिजबिहाड़ा थवां हारी गेइयां न। नेशनल कांफ्रेंस दे नेता नासिर असलम वानी होर कुपवाड़ा थवां हारी गए। कांग्रेस दे रमन

भलला ते तारा चंद होर बी अपनी-अपनी सीट थवां हारी गए न। भारतीय जनता पार्टी दे प्रदेश अध्यक्ष रविंद्र रैना होर नौशैहरा सीट थवां चुनां हारी गए न।

<><><><><><>

JK-BJP-Best Performance

जम्मू खिते च बीजेपी नै अजें तगर दा अपना बेहतर प्रदर्शन करदे होई 29 सीटां जितियां न। 2014 च पार्टी नै 25 सीटां हासिल कीतियां हियां। कांग्रेस गी राजौरी च शड़ी इक सीट हासल होई। औदे बड्डे नेता जेदे च साबका उप मुखमंत्री तारा चंद ते किश साबका मंत्री शामिल न, गी हार दा सामना करना पेआ ऐ। भारतीय जनता पार्टी गी बी तगड़ा झटका लगगा ऐ की जे पार्टी दे प्रदेश अध्यक्ष रविंद्र रैणा होरें गी हार दा सामना करना पेआ ऐ। जम्मू खिते दी 43 सीटें चा 29 सीटां हासल करिए बीजेपी इक्कली बड्डी पार्टी बनिए उभरी ऐ। नेशनल कांफ्रेंस गी 7 सीटां हासल होइयां न। त्री थाहर पर आजाद मेदवार रेय जिनें 5 सीटां हासल कीतियां। आम आदमी पार्टी गी बी इक सीट थहोई। कांग्रेस गी इक सीट हासल होई। गुलाम नबी आजाद हुंदी पार्टी डी.पी.ए.पी, पीडीपी, बीएसपी, पेंथर्स पार्टी, जे.के.ए.पी गी कोई सीट हासिल नेई होई। भारतीय जनता पार्टी नै विधानसभा चुनाएं च लगातार दुई बारी जम्मू खिते च अनुसूचित जाति लेई आरक्षित सारियां 7 सीटां जितियां न, पर अनुसूचित जन जाति लेई आरक्षित 6 सीटें पर उसी हार दा साकना करना पेआ।

<><><><><><>

Omar-INDI Alliance

नेशनल कांफ्रेंस दे उप प्रधान ओमर अब्दुल्ला होरें कल आखेआ जे आई.एन.डी.आई गठबंधन आला धड़ा अपने भ्यालें कन्ने मिलिये गठबंधन दा नेता चुनने गितै मगरा गै जम्मू-कश्मीर च सरकार बनाने दा दावा पेश करोग। ओमर होरें आखेआ जे नेशनल कांफ्रेंस दा विधायक दल जम्मू-कश्मीर दा अगला मुखमंत्री चुनने गितै बैठक लाग। उनें गलाया जे एह विधायक दल ते गठबंधन दे भ्यालें पर निर्भर करदा ऐ जे ओह कुसी अगले 5एं बरें लेई जम्मू-कश्मीर दा मुखमंत्री बनाना चाहंदे न। ओमर होरें आखेआ जे चुनां नतीजे सवां एह साफ ऐ जे जम्मू-कश्मीर दी सियासत च लोकें बीजेपी दे खलाफ वोट दिता ऐ। उनें आखेआ जे लोकें दे फैसले नै पार्टी दियां जिम्मेवारियां बदाई दितियां न। ओमर होरें पीडीपी अध्यक्ष महबूबा मुफ्ती हुंदा बी आभार प्रगट कीता जिसलै उनें उनेंगी उंदी शानदार जित लेई मुबारकबाद दिती।

<><><><><><>

PM-JK Congrats

प्रधानमंत्री नरेंद्र मोदी होरें जम्मू-कश्मीर च विधानसभा चुनां दे कामयाबी कन्ने तोड़ चढ़ने गी भारतीय संविधान ते लोकतंत्र दी जित करार दिंदे होई आखेआ ऐ जे उंदी सरकारें जम्मू-कश्मीर गी दफा 370 ढाड़ए, कर्फ्यू, हड़ताल, हिसां ते बक्खवाद दिएं बेड़िएं चा आजाद कराया ऐ। जम्मू-कश्मीर ते हरियाणा दे चुनां नतीजे सामने औने दे बाद कल रातीं नमीं दिल्ली च बीजेपी मुख्यालय च पार्टी कार्जकर्ताएं गी संबोधित करदे होई मोदी होरें आखेआ जे जम्मू-कश्मीर च ऐकती होए दे चुनां विशेष ते महत्वपूर्ण रेह कीजे उत्थे पैहली बारी बाबा साहेब भीम राव अम्बेडकर हुंदा तैयार कीता गेदा संविधान पूरी चाल्ली लागू हा ते उनें लोकें गी वोट पाने दा अधिकार थोआ जेड़े कई दहाकें थमां अपने इस लोकतांत्रिक अधिकार कोला वंचित हे। उनें

आखेआ जे जम्मू-कश्मीर ते हरियाणा दे चुनां नतीजे कन्नै उंदी सरकार दा दिल बधेया ऐ ते प्रोत्साहन थहोआ ऐ जे ओह भारत गी दुनिया दी त्री सब्बनें शा बड्डी अर्थ बवस्था बनाने लेई होर मते जोश ते शिद्दत कन्नै अपनिएं नीतिएं गी अगड़े बधान। मोदी होरें जम्मू-कश्मीर नेशनल कांफ्रेंस गी चुनाएं च औदे शानदार प्रदर्शन लेई ममारकबाद दिती। तोआई केंद्री गृह मंत्री अमित शाह होरें आखेआ जे जम्मू-कश्मीर च पारदर्शी ते रमानदारी आले ढंग्गे सिर कामयाब विधानसभा चुनाएं दे तोड़ चढ़ने कन्नै इत्थे लोकतंत्र गी नमें सिरेआ मजबूती हासल होई ऐ जेदा प्रधानमंत्री नरेंद्र मोदी होरें वायदा कीते दा हा।

<><><><><><>

NC-7th Term

नेशनल कांफ्रेंस दे नेता अब्दुल रहीम राथर ते अली मोहम्मद सागर, दौनें जम्मू-कश्मीर विधानसभा चुनाएं च रिकार्ड 7मीं बारी जित हासल कीती ऐ। अब्दुल रहीम राथर जेड़े पैहले आली जम्मू-कश्मीर रियासत दे खजाना मंत्री रेही चुके देन, एहदे शा पैहले 1977 कोला लेइए चरार-ए-शरीफ विधानसभा हल्के थमां 6 बारी चुनां लड़ी चुके देन। 1983, 1987, 1996, 2002 ते 2008 दे चुनाएं च बी ओह कामयाब रेह पर 2014 च ओह पीडीपी दे गुलाम नबी लोन हुंदे कोला हारी गए हे। अली मोहम्मद सागर जेड़े जे नेशनल कांफ्रेंस दे महासचिव न, उनें बी 7मीं बारी विधानसभा चुनां च जित हासल कीती ऐ। पैहली बारी ओह 1983 च बटमालू थमां जिते, 1987 च बी उनें एह सीट हासल कीती। मगरा ओह 1996 च खानेयार थमां चुनां जिते ते ओहदे बाद ओह इस सीट परां कदे चुनां नेई हारे। उनें श्रीनगर निगम दे साबका मेयर शेख इमरान गी 9 जहार 912 वोटें कन्नै हराया जेड़े बतौर इक अजाद मेदवार चुनां लड़े करदे हे।

तोआई हकीम मोहम्मद यासिन बडगाम जिले दी खान साहिब सीट पर 6मीं बारी जिते न ते एन.सी मुबारक गुल ईदगाह सीट परा 6मीं बारी ते सीपीआई (एम) दे एम.वाई तारीगामी कुलगाम सीट पर 5मीं बारी जेत्तू घोषित होए न।

<><><><><><>

Mufti

पीपल्स डेमोक्रेटिक पार्टी दी अध्यक्ष ते साबका मुखमंत्री महबूबा मुफ्ती होरें एन.सी-कांग्रेस पर लोकें आस्सेया जताए गेदे भरोसे पर खुशी जाहिर कीती। प्रेस कांफ्रेंस गी संबोधित करदे होई मुफ्ती होरें आखेआ जे कश्मीर दे लोकें समझदारी कन्नै कम्म लैता ते बीजेपी गी सत्ता थवां बाहर रक्खेआ।

<><><><><><>